

左恪靖侯奏稿初編

恪靖奏稿初編卷十二目錄

奏報截剿竄浙逆匪收復四縣迭勝情形摺

覆陳入皖浙軍應調回進剿及籌兼顧情形片

攻剿杭州餘杭踞逆迭勝擊斃首逆情形片

覆陳杭嘉湖減漕情形摺

陳明劉臬司丁憂回籍治喪情形片

陳請紹屬四縣本年應徵錢糧分別緩徵片

請議卹餘姚縣殉難之紳士片

攻剿餘杭踞逆大獲勝仗情形摺

援剿江皖出力人員請獎摺

覆陳孫孫侍讀挾嫌叅奏不實情形摺

覆陳籌辦軍事情形片

奏報截剿竄浙逆匪收復四縣迭勝情形摺

奏爲官軍截剿竄浙逆匪疊獲勝仗現籌辦理情形恭摺奏祈

聖鑒事竊劉典一軍移駐績溪後僞金王僞平東王僞根王等數大股不能上犯徽歙遂由甯國縣千秋關竄入浙境蔓延昌化於潛一帶擄掠直至潛安分水邊界希圖擾我腹地以牽動杭州餘杭官軍之勢九月十九日派防分水遊擊黃大玉叅將馬復震出隊至藤車埠截剿畧有斬馘劉典聞賊竄昌化之信卽飭記名總兵

黃少春留浙補用知府李耀南副將黃有功候補知縣
楊詠春等率所部各營五成隊於十八日自績溪起行
各持七日糧由昱嶺關赴昌化進剿並派張聲恒所部
千人回扼清安而自駐績溪縣臨溪地方以防旌德之
賊上犯二十日黃少春等行抵冷水鋪賊尙未知也二
十一日黎明黃少春與黃有功率所部由左路進派叅
將周紹濂遊擊李良平都司劉昌選所部由中路進李
耀南楊詠春所部由右路進行至株柳地方遇先鋒悍
賊百餘人盡殲之乘勢撲水穿司賊巢該逆猝不及防

殺賊數百名正俘斬間後面賊隊突至憑河抗拒周紹
濂李良平梟水過河直衝賊陣周紹濂手刃騎馬賊目
二名李耀南揮兵繼進賊勢不支紛紛敗竄我軍跟蹤
緊追至白中橋忽僞金玉根王等大隊蜂擁來援勢甚
兇悍李良平扼橋力堵各營復整隊排列鎗礮連施塵
戰約一時許十二都之賊又從左手山谷小路飛奔而
來幸黃少春黃有功等先已派隊伏於叢莽中賊至伏
發復斃賊百餘名李耀南李良平等俟黃少春抄出賊
後亦奪橋而進右路之賊從下游涉水來者楊詠春又

由山邊橫出截之賊大驚潰我軍三面合追該逆奪路
狂奔沿途斃賊又數百名溺死者無數可紀生擒二百
餘名解散甚多立將昌化縣城收復計是役共斃賊二
千餘名奪獲偽印百餘顆騾馬二百餘匹牛數十頭穀
米雜糧千餘石拔出難民數千名我勇受傷十餘名陣
亡二名餘黨向甯國縣界竄去是夜於潛大陽埠錫口
等處之賊亦聞風潛遁二十二日黃少春等督隊冒雨
追之不及遂收隊還二十八日仍折回安徽績溪老營
該逆後起復由甯國竄至孝豐與前由廣德竄來各股

合隊眾尙數萬本月初三四等日分兩股一竄臨安西鄉一竄臨安北鄉去餘杭青山官軍營盤均不甚遠臣

比飛飭駐新城副將劉明燈叅將張完元張人和等各派七成隊迅速進剿飭駐桐廬之副將劉明珍等率所部助之並令溫虛道魏喻義派隊就近夾擊蔣益澧亦飭遊擊徐文秀率所部五營赴亭子頭會剿初八日各營進剿臨安北路賊見官軍至卽倉皇奔逃僅追斬數十名初九日黎明劉明燈劉明珍等分攻西路直抵橫路禮畷舉足里高村峯嶺各賊巢賊猶未覺我軍一鼓

齊進喊殺震天該逆紛紛驚竄各勇圍殺斃賊七八百名生擒三百餘名奪獲騾馬八十餘四旗幟三百餘件陣斬僞佶天豫謹天豫各逆目而奪其印餘賊翻山望北逃竄拔出難民約數千計各營追至朗嶺乃收隊還此前月二十一二本月初八九等日我軍截剿竄浙各股逆匪連獲大勝之實在情形也現在杭州餘杭兩城踞逆堅守如故各軍方剿援賊勢難合圍應俟援皖各營回浙乃敷分布臣前以皖賊紛紛竄浙上游喫緊石太旌德未復徽防不可稍鬆王開琳留防黟縣劉典移

軍績溪均難遽撤不得不暫屯嚴州以期上下兼顧業
經陳明在案頃據報皖南軍情石埭古逆率黨獻城投
降太平江逆旌德盧逆或降或走三城均已收復徽池
一律肅清餘眾竄踞甯國廣德孝豐之間勢甚渙散臣
擬令劉典所部各營由昌化於潛趨臨安進剿孝豐爲
規取湖州之地王開琳一軍現當徽防無事亦可調歸
以備策應臣軍後路穩固拜摺後亦卽日移紮富陽督
飭各軍先將餘杭攻克然後悉力杭州分規湖郡仍與
皖南各軍聯絡一氣互相應援斷不稍分畛域致誤大

局而煩

廬念所有各軍截剿竄浙賊匪叠獲勝仗情形恭摺田
驛六百里馳奏伏乞

皇上聖鑒訓示施行謹

奏 同治二年十二月二十一日

議政王軍機大臣奉

旨另有旨欽此

覆陳入皖浙軍應調回進剿及籌兼顧情形片

再十月十一日 臣任嚴州軍營欽奉

寄諭青陽雖已解圍而太平石埭旌德甯國四縣尙爲賊踞徽郡防務未可稍鬆左宗棠現在駐軍富陽距徽防稍遠但係浙師後路亟須兼籌妥顧仍著左宗棠隨時策應與皖南諸軍聯絡聲勢迅掃妖氛毋稍大意欽此跪誦之餘敬仰我

皇上垂念皖疆軍務關繫全局地勢戎機洞若觀火下懷欽佩曷可言宣竊維制賊之要在避長圍防後路臣於元年正月遵

旨覆奏摺內已詳陳之上年十一月調道員王文瑞入

皖今年二月調臬司劉典入皖合其一萬餘人均於無可抽調時勉爲抽調亦嚴防後路之意也昨因青陽圍解逆首僞金玉鍾逆僞平東王何逆等各率黨夥東竄

臣

卽飛飭劉典王開琳漸次移軍東向扼其由皖竄浙

之路於時曾圍藩有調浙軍過嶺會剿之咨臣未敢應

蓋清陽之圍旣解石太賊勢已孤野無可掠自無久踞之理又江忠義等旣軍其西鮑超一軍復逼其東勢必逼賊南趨南趨卽入浙境入浙未復之區猶之可也若由欽境竄清安遂安則出臣軍之後若由績溪甯國竄

昌化於潛則出杭州餘杭各軍之後殘黎難堪再擾而
浙江大局亦將被其牽綴臣所以尅期進駐富陽旋復
中止者此也浙軍援皖自應兼顧浙境豈有坐視皖賊
入浙之理浙軍嚴防後路自應先其近者豈有舍近圖
遠之理臣所以檄劉典等軍漸次東向遏賊竄浙之路
劉典所以駐軍臨溪一聞逆賊繞由甯國縣境折竄昌
化卽派隊馳援者此也幸而竄入昌化之賊經總兵黃
少春等由績溪入昱嶺關回援一戰破之若已出嶺會
剿則前拒虎而後進狼誠恐於皖未必有功於浙則必

有害耳昌化肅清後劉典所派之黃少春等於前月廿

八日收隊回皖仍駐臨溪老營曾國藩所奏臣軍回浙

或卽指此現在石埭太平旌德之賊業已肅清甯國縣

城亦已無賊而湖州孝豐一帶竄來之賊甚多天目山

麓時有大股賊蹤出沒以局勢論之則皖緩而浙急也

明矣臣軍之入皖者應調回浙省以備進剿至安籌兼

顧則固臣之本謀豈敢稍涉疎虞仰煩

聖慮謹據實覆陳伏乞

皇上聖鑒訓示謹

奏 同治二年十月二十一日

議政王軍機大臣奉

旨另有旨欽此

議政王軍機大臣 字寄同治二年十一月初六日奉

上諭左宗棠奏截剿竄浙逆匪疊勝現在籌辦情形入
皖浙軍應調回進剿各摺片逆首僞金王等由甯國縣
竄入浙境蔓延昌化於潛一帶經劉典自績溪飭派總
兵黃少春等同浙進剿斃賊二千餘名立將昌化縣城
收復該逆後股復由甯國竄至孝豐分擾臨安雖經官

軍擊敗而湖州孝豐一帶竄賊甚多天目山麓時有大股賊蹤出沒浙省援皖之軍自應調回迅籌進剿現在皖南軍事大定昨據會國藩等奏到東壩甯國高涇溧水各城次第俱下惟廣德尙爲賊踞皖軍得手逆賊南趨浙境必然之勢昨日諭令會國藩速調勁旅進克廣德堅城與浙軍互相聯絡左宗棠現檄劉典所部由昌化於潛趨臨安進剿孝豐並將王開琳一軍調回策應卽著飭劉典等迅速進兵收復孝豐爲規取湖州之計並與皖南進攻廣德之師互爲聲援使皖浙諸軍聯爲

一氣以期得手杭州餘杭城勢如故該督現擬即日移軍富陽督軍先克餘杭然後悉力杭州諒不難次第掃蕩現在蘇州省垣業已克復皖城亦漸就廓清各路軍情同時得手金陵杭州兩處各軍已薄城下立盼捷音該督其迅奏膚功同膺懋賞有厚望焉將此由六百里諭令知之欽此

攻剿杭州餘杭踞逆迭勝擊斃首逆情形摺

奏爲官軍攻剿杭州餘杭踞逆迭獲大勝擊斃首逆現
籌辦理情形恭摺馳

奏仰祈

聖鑒事竊杭州餘杭兩處賊匪經官軍迭次痛剿復於
餘杭東門至杭州之倉前長橋女兒橋等處糾添悍黨
欲由何母橋繞截餘杭各軍後路均經官軍擊退蔣益
澧因何母橋太平橋一帶港汊紛歧賊情詭譎每圖乘
隙內竄十月十六日派副將周廷瑞都司王東林於天

水橋扼紮一壘參將鄧受福於護國橋扼紮一壘康國
器亦派叅將古捷芳帶勇會剿賊伏不出鄧受福率親
兵前往窺賊動靜突遇賊二千餘分路來撲鄧受福督
隊奮擊斃賊數十名因眾寡不敵中傷親兵數名鄧受
福回救手刃數賊右脇忽被賊槍洞穿而殞周廷瑞王
東林帶隊馳至賊始潰竄十七日蔣益澧飭劉樹元曹
魁甲徐文秀出隊至何母橋並於方家橋太平橋添築
二壘十八日長橋女兒橋之賊來犯經官軍擊走其杭
城踞逆因嘉興等處新來悍賊數萬亦於十八日卯刻

乘大霧迷漫分路由萬松嶺直撲副湘左營營壘都司
張志公憑濠放槍迎擊該逆愈逼愈近丁賢發率副湘
後營從山巔馳下協力助守約一時許高連陞督同余
朝貴張正順等所部馳至張志公丁賢發出壘奮擊賊
勢稍却時洋將德克碑亦帶花勇前來助剿並令淺水
輪船點放開花大礮轟斃數賊楊正謨劉連陞羅啟勇
各率舢板師船將沿河之賊擊退登岸衝殺該逆見水
陸各軍大隊齊至分投迎拒酣戰兩時斃賊數百賊大
敗其由清波門所出之賊被王月亮督同閩字中營截

殺潰退回城各軍乘勢追剿又斃賊多名此十月十六
十八等日攻剿獲勝之情形也嗣康國器一軍於十一
月初五初七等日攻剿餘杭東門埭賊壘亦迭有斬獲
臣馳抵富陽後卽於十一月初十日率輕騎赴餘杭察
看形勢見該處依山帶水地勢遼闊東南路直達杭州
北可通武康德清西可通孝豐安吉官軍僅扼其東南
兩面杭湖等處之賊仍可往來自如當調駐紮富陽之
朱明亮劉璈楊和貴余佩玉等五營駐紮分水張聲恒
等四營齊至餘杭會剿一面飭副將劉名珍率駐嚴州

兩營瀋安兩營填紮分水由皖調回記名總兵黃少春所部克勇一軍亦檄其由分水新城以出餘杭進北西北一路十二日令羅大春簡桂林劉榮合賴錫光等四營由青山進紮丁橋十七日令劉璈朱明亮余佩玉等進紮石門橋臣當飭魏喻義徐文秀各營列隊南門康國器所部各營列隊東門以掣賊勢羅大春三營由丁橋出西門大路楊昌濬率親兵及楊和貴新右營由丁橋小路李耀南黃有功張福齊率所部繞出西北隅辰刻城賊壘賊及東北門外之賊悉眾來撲官軍分路接

仗徐文秀朱明亮與蔣益澧派來馬步各營見西路賊勢較重馳往夾擊鏖戰逾時賊忽分股由左路搶上山梁勢極克悍賴錫光一營稍却楊昌濬白冠玉等從北路山峽中突起衝殺賊始駭奔官軍截之殺悍賊百餘名生擒黃衣白衣賊目十餘名追近城邊賊爲水阻各軍逼之戮斃溺斃無算其村內黃衣悍賊衝出拒戰適李耀南等從左路馳至羅大春等出右路抄擊遂大敗各軍乘勢痛擊斃賊數百名奪獲洋鎗六十餘桿抬馬鎗百數十件旗幟刀子無算其東門外之賊亦經康國

器派隊擊殺多名二十四日令張聲恒齊蘭禮劉端冕
楊松林進紮餘城西北隅蔣益澧率馬部九營從石門
橋出西路劉璈等四營繼之黃少春楊詠春率馬步十
三營由丁橋出北路楊昌濬率劉榮合賴錫光楊和貴
繞出西北一帶官軍排列甫定該逆挑悍黨萬餘由北
路前來拒戰西門之賊亦皆出隊負城壘而陣黃少春
率各營從左路先進擊斃先鋒悍賊數十蔣益澧楊昌
濬各率所部衝入賊陣斃悍賊數十賊分數大支拚死
抗拒官軍三面蹙之裹賊中央節節逼壓而進且堵且

衝愈戰愈奮賊敗至城北沿途鮮血淋漓屍骸枕藉偽
歸王鄧光明偽朝將汪海洋猶麾其死黨苦相指格蔣
益濃策馬陷陣各軍乘之首逆鄧光明經官軍抬礮轟
穿左脇立斃陣前餘賊搶護入城時巳酉正官軍乃收
隊而還是日自辰至酉鏖戰數十合斬大小賊目百數
十級黃衣白衣青衣悍賊約共五百餘奪獲賊馬二十
餘洋鎗旗械無算賊之被鎗礮轟斃曳屍入城者殆千
數百計其東路康國器一軍吳光亮康熊飛林珠丁應
龍等亦攻破柯埭賊卡乘勢進攻牛販太平橋賊壘踰

濠破柵而進擊斃黃衣賊日一名並分支截擊倉前援賊斬馘亦多此十一月十七二十四等日官軍猛攻餘杭縣城殲斃首逆克獲全勝之實在情形也賊敗後克饑頓衰於餘城西北門外連夜修濬長濠北門外添築三壘官軍日夜搦戰賊鼠伏不出而東北瓶窰鎮倉前林清營何家陡門一帶添築賊壘甚多揚言齊隊來撲官軍營壘然胸縮不敢前也臣於戰後與蔣益澧楊昌濬黃少春等商議由北路築壘分軍襲取瓶窰絕其糧路蔣益澧暫回留下鎮老營布置防守臣出營已十五

日須回富陽大營清理積贖然後拔營進駐東西兩路適中之橫溪頭以便督剿蔣益澧抵老營正布置杭州一路戰守機宜登山遙瞰杭城知賊因官軍急攻餘杭各路援賊均趨重杭州西北餘杭東北一帶凡自賊中逃出者均言鄧逆授首羣賊洶懼之狀甚悉蔣益澧擬先攻杭州城外各壘以怵之十二月初一日令記名提督高連陞洋將德克碑等會同水路各營進攻鳳山門外各壘親督馬步各營列隊錢塘門外素亭山棲霞嶺一帶牽制城賊高連陞等數路齊進各壘之賊紛紛揚

旗而出高連陞乘其尙未成列猛撲之水師營官楊政
謨劉連陞等率各師船沿江轟擊高連陞德克碑等大
呼陷陣賊勢披靡縮退石壘希圖抗拒官軍躡蹤追入
破賊一壘盡殲之復分攻各壘各壘之賊望風逃竄不
敢據壘自固自辰至午九壘次第俱破高連陞等追賊
直抵城隍山脚楊政謨劉連陞等師船排礮轟攻江邊
石壘亦破之計共斃賊二千有奇奪獲旗幟礮械不可
勝紀現在杭州城外只餘古塘賊壘及近城兩壘未破
蔣益澧卽令高連陞分所部五營駐賊五壘德克碑所

部駐賊二壘逼之此十二月初一日水陸官軍攻破杭
州城外賊壘克獲全勝之實在情形也臣維杭州形勢
所恃爲屏蔽者餘杭一城賊據之可以通嘉湖糧路而
拒官軍官軍得之可以扼嘉湖之吭而制杭賊之命悍
酋鄧光明汪海洋所爲拚死力爭者此也今鄧光明業
已伏誅而杭州城外各堅壘掃除殘盡餘杭之賊自不
能不同顧杭城老巢旦夕必有可乘之機如兩城有一
先下則浙西三郡大局可冀以次漸定蔣益澧擬卽移
紮饒頭山雷峯塔秦亭山並調橫溪頭各營猛攻古塘

堅壘臣函飭楊昌濬嚴密偵探如餘杭賊勢變動卽相機截之令其首尾不能相顧復檄署衢州鎮總兵劉培元統各營水師下剿以重錢江之險而助陸路聲威臣拜摺後仍卽拔營進駐餘杭之橫溪頭以便相機督剿兩城之賊務當妥爲籌策以冀稍紓

聖慮所有此次力戰陣亡之副將扈照乾副將銜留浙補用叅將鄧受福王洪熙遊擊陳宗說都司周富棠都司銜藍翎守備吳葆光千總徐再發千總銜把總尹其順藍翎把總黃連陞均請

飭部照例從優議卹以慰忠魂其初一日亡傷各將弁
尙未據蔣益澧稟報前來容俟查明伏乞
恩施謹將戰勝情形據實馳奏伏乞

皇上聖鑒訓示施行謹

奏 同治二年十二月初四日

議政王軍機大臣奉

旨另有旨欽此

覆陳杭嘉湖減漕情形摺

奏爲遵

旨覆查坑嘉湖三屬徵收漕糧情形並浙東各屬地丁亦應核減温州府屬已經減定恭摺具

奏仰祈

聖鑒事竊臣欽奉同治二年六月初三日

上諭浙省疊遭兵燹小民流離失所殊堪軫念自應將該省漕糧量予減免以示公溥之仁著左宗棠通飭杭嘉湖三屬將實在應徵漕糧稅則詳細確查各按輕重分成量減奏明辦理欽此仰見我

皇上惠愛黎元痼瘼在抱值此度支匱乏猶議減賦薄

征厚澤深仁實前代所未有跪誦之下飲服難名惟查
杭嘉湖三屬額征漕米一百零三萬數千石內實起運
米八十六萬四千二百餘石白糧粳糯正耗米四萬四
千三百餘石改白征漕米四萬九千八百餘石較之江
蘇常鎮兩府爲尤重向年開征杭湖各屬皆先本後折
嘉興七屬皆先折後本其交折色者初收每石已在六
千餘文嗣後逐漸加增折收一石照時價約合兩石有
奇其交本色者每石有加六七斗至八九斗不等竭小
民終歲之力徒爲吏胥中飽衿棍分肥之資所以嘉湖

各屬時有開漕之案也是欲剔除宿弊必先逐縣清釐
現在杭嘉湖均未克復戶口半多三府流亡征冊亦俱
燬失勢難核實勾稽應俟地方一律肅清遴派官紳查
明向來額徵若干淨收若干各就各縣情形分別裁減
明定徵數頒示勒石庶實惠得以均霑民困可期稍復
此杭嘉湖三屬漕糧刻下尙未能查辦之情形也其浙
東各屬地丁南米淨收之數雖不及杭嘉湖之甚弊端
亦在所不免除新復各郡縣田畝未墾莊冊未全者應
俟查明辦理外其温州一府稍稱完善當飭該管道府

確查詳辦茲據兼署溫處道溫州府知府周開錫稟稱
將道府衙署一切陋規全行裁革按照歷年官收民納
實數酌中核減計溫州一廳五縣一衛三場額徵銀十
六萬六千零五十九兩七錢三分七釐穀三萬五千五
百六十九石零一斗一合米三萬七千八百二十七石
六斗七升六合此次除正額仍照常征解外其餘浮費
共減去錢四萬零五百餘千米三百餘石本年卽照核
減之數征收此浙東各屬錢糧亦應核減而溫州府屬
已經減定之情形也竊維東南數省財賦之重以江蘇

之蘇松常鎮太四府一州浙江之杭嘉湖三府爲最查
杭嘉湖額征漕糧一百零三萬數千石而州縣淨收又
不啻倍蓰在州縣宜有餘矣乃近來虧空更鉅者則以
包戶日多幫費日重攤捐之名目愈繁往來之供應彌
盛以致乙年之漕甲年已經挪用損

國病民莫此爲甚咸豐七年湖南省核減漕糧時臣正
在升任四川總督前湖南巡撫駱秉章幕中見其所定
章程最爲允協嗣後湖北江西仿照行之官民稱便將
來清釐杭嘉湖三屬漕糧自應查照辦理而今日之急

務尤在守令得人斯立法可期久遠未有吏治不清閭閻得以無擾民生未遂府庫顧能獨充者也所有遵旨覆查杭嘉湖三屬漕糧及浙江各屬地丁温州府屬已經減定各緣由理合恭摺具

奏伏乞

皇上聖鑒訓示謹

奏 同治二年十二月 四日

議政王軍機大臣奉

旨另有旨欽此

陳明劉臬司丁憂回籍治喪情形片

再訖江臬司劉典在營聞訃丁憂因皖浙攻剿正當與
緊經_臣奏明可否改爲署任俟軍務稍定准其回籍治
喪請

旨遵辦一摺於十一月初四日欽奉同治二年十月十
七日

上諭劉典著改爲署在浙江按察使俟軍務稍定再行
回籍治喪事畢卽行赴浙統帶原部剿賊欽此臣伏查
皖南境內自石埭太平旌德三城收復徽甯次第肅清

鮑超一軍復進克東壩建平局勢已臻穩固劉典於十月二十一日來嚴謁見泣請回籍治喪情詞極爲懇切臣觀其形神憔悴未忍強留而現在軍務稍定該臬司回籍治喪於事勢尙無不可當令其卽日起程一俟治喪事畢速卽遵

旨來浙剿賊仰答

天恩除臬司事務仍委衢州府知府林聰彞代辦外其所部各勇查有記名總兵黃少春戰功卓著眾望素孚堪以接帶合併陳明伏乞

聖鑒謹

奏 同治二年十二月初四日

議政王軍機大臣奉

旨另有旨欽此

陳請紹屬四縣本年應征錢糧分別緩征片

再紹興府屬之餘姚上虞新昌嵊縣等縣均係上年克復應征本年錢糧不在新復蠲免之列據代理紹興府知府楊叔懌因時届下忙應征之際飭據該四縣稟覆地方被擾較重夏間雨澤愆期田禾受傷小民未復瘡

庚又遭歉歲若令按額全完民力實有未逮又據石堰
場大使稟稱所轄竈地坐落餘姚縣境事同一律應請
附入分別緩征當飭代辦藩司蘇式敬核議茲據詳稱
細加察訪委係實在情形所有餘上新嵒四縣應征本
年錢糧石堰場應征竈課應請按額征完五成緩征五
成等情前來臣覆核無異可否籲懇

天恩俯准將餘姚上虞新昌嵒縣四縣應征同治二年
新賦石堰場應征竈課按額征完五成緩征五成其緩
征銀數俟同治三年察看情形分別帶征庶民力稍可

展紓而額賦亦不致虛懸理合附片具陳伏乞

聖鑒訓示謹

奏 同治二年十二月初四日

議政王軍機大臣奉

旨另有旨欽此

同治二年十二月二十四日內閣奉

上諭左宗棠奏請將餘姚等縣上忙錢糧及石堰場應
征鹽課緩征等語浙江紹興府餘姚等縣地方被擾最
重本年夏間雨澤愆期田禾受傷若仍將應征錢糧按

額全完民力實有未逮石堰場竈地坐落餘姚縣境事
同一律加恩著照所請所有餘姚上虞新昌嵊縣應征
同治二年新賦石堰場應征竈課均著按額征完五成
緩征五成其緩征銀數俟同治三年察看情形分別帶
征以紓民力該督撫卽刊刻謄黃遍行曉諭務使實惠
均霑毋任吏胥舞弊以副軫念災區至意該部知道欽
此

同治二年十二月二十四日內閣奉

上諭左宗棠奏官軍攻剿杭州餘杭殲斃首逆迭獲大

勝曰搢杭州餘杭之賊屢經官軍痛剿文於長橋女兒橋等處糾添悍黨迭次來犯均經官軍擊退其杭城踞賊乘霧直撲官軍營壘經水陸各軍分投剿擊鏖戰兩時賊大敗潰左宗棠於馳抵富陽後分飭各軍進剿餘杭踞逆悉眾來撲官軍斃其悍賊數百名逼水淹斃者無算城賊拚死抗拒蔣益澧等軍三面蹙之賊屍枕藉偽歸王鄧光明被礮轟穿左脇立斃陣前計斬黃衣等悍賊五百餘名轟斃之賊約千數百計杭城逆匪聞風洵懼蔣益澧派令記名提督高連陞洋將德克裨等會

同水陸各營進攻鳳山門外破賊九壘逐北直抵城隍
山脚斃賊二千有奇剿辦甚爲得手仍著左宗棠督飭
各軍迅將杭州餘杭兩城迅圖克復立奏膚功所有此
次力戰陣亡之副將扈照乾副將銜留於浙江補用叅
將鄧受福王洪熙遊擊陳宗說都司周富棠都司銜藍
翎守備吳葆光千總徐再發千總銜把總尹其順藍翎
把總黃連陞均著交部照例從優議卹以慰忠魂欽此
議政王軍機大臣 字寄同治二年十二月二十四日
奉

上諭左宗棠奏官軍攻剿杭州餘杭踞逆疊獲大勝藏
斃逆首遵覆杭嘉湖減漕情形及臬司劉典回籍治喪
各摺片本日已明降諭旨將獲勝情形宣示陣亡副將
扈照乾等照請優卹矣此次官軍猛攻餘杭陣斃偽王
鄧光明克獲全勝杭城外踞賊又被官軍破其九壘僅
餘古塘賊壘及近城兩壘未下攻剿甚爲得手現在杭
州之賊聞風洶懼餘杭賊勢亦將回顧杭城老巢均有
可乘之機左宗棠卽日拔營進紮餘杭之橫溪頭相機
督剿蔣益澧進攻古塘堅壘復飭楊昌濬偵探餘杭賊

勢相機截擊所籌均極周妥卽著督飭各軍乘勝進取
力圖恢復兩城迅奏捷音以紓殷盼昨據李鴻章奏滬
軍收復嘉善縣城已諭令該撫進規嘉興以掣杭湖各
賊之勢左宗棠前奏亦已分兵進規湖州杭賊向賴嘉
湖援賊接濟糧運此時各軍同時並舉該逆實有兼顧
不遑之勢如杭餘兩城一處得手則浙西三郡可期功
收破竹漸次底定卽著該督妥爲籌策用副馳驅洋將
德克碑此次會攻杭城賊壘甚爲出力著左宗棠仍飭
令勉籌會剿迅奏膚功署浙江臬司劉典丁憂懇請回

籍泊喪情詞極爲迫切已由左宗棠飭令起程惟現在浙西軍務攻剿正形喫緊該臬司帶兵甚爲得力著左宗棠飭令趕緊料理一俟治喪事竣卽行赴浙剿賊以副委任杭嘉湖三屬回徵漕糧浮收過重該督擬俟地方收復再行分別議減浙東各屬地丁積弊亦甚均應查明辦理現在温州尙稱完善該督已督飭該管道府將一切陋規裁革除正額照常徵解外其餘浮費減去錢四萬五百餘千米三百餘石足見體恤民瘼實心任事其浙東各屬並著一律辦理將來杭嘉湖克復後卽

著該督慎選賢明守令剔除積弊將徵數妥立章程分別議減期於永遠遵守以副朝廷軫念窮黎之意另片奏餘姚等縣請緩徵等語本日已明降諭旨照准矣將此由六百里諭令知之欽此

請議卹餘姚縣殉難之紳士片

再餘姚縣紳士候選員外郎謝敬死事情形奉

旨交臣查明具奏臣當飭紹興善後總局補用知府許

瑤光代理紹興府知府楊叔懌等就近確查茲據許瑤光等稟稱該員謝敬向在本籍辦團同治元年七月帶

勇駐紮四門鎮與縣城相爲犄角自七月十九日至閏
八月二十八日逆匪屢次圍攻大小二十餘戰殺賊數
千名九月初七日移營馬渚正擬乘勝進取詎料上虞
賊匪分黨數萬一至陡壘一至馬渚合圍已革護提督
陳世章派兵馳援逆匪已衝入營盤各勇潰散謝敬手
刃數賊眾寡不敵與附生呂受豫俱陷賊中本年五月
始據其兄謝端稟有逃出常勝軍勇丁鍾桂堂報稱上
年九月十三日與謝敬同時力竭被擄關禁一處逆賊
始則多方逼脇繼則婉言勸慰謝敬義不肯屈及官軍

克復上虞縣城逆賊逃竄欲帶謝敬過江謝敬罵不絕口被黃衣賊目用刀殺傷推落江水身死至呂受豫當日業已陣亡等語並將隨同陣亡各弁勇開單呈請轉詳請卹等情前來臣查謝敬以在籍紳士帶勇殺賊雖力竭被執仍能罵賊捐軀大節凜然深堪嘉憫該員於咸豐十一年間隨同官軍擒捕土匪王春生等出力經前團練大臣王履謙奏請

賞加道銜尙未接准部覆應請

旨將候選員外郎謝敬照道員例從優議卹以慰忠魂

其隨同陣亡之州同銜附生李立夫附生呂受豫監生
謝蕪芸謝嗣達五品翎頂儘先把總黃明耀並請
飭部照例議卹理合附片具

奏伏乞

聖鑒施行謹

奏 同治二年十二月初四日

議政王軍機大臣奉

旨謝敬著照道員例從優議卹李立夫等均著照例議
卹該部知道欽此

攻剿餘杭踞逆大獲勝仗情形摺

奏爲官軍攻剿餘杭踞逆大獲勝仗現籌辦理情形恭摺

奏仰祈

聖鑒事竊餘杭踞逆經官軍於十一月十七二十四等日擊敗後復於西北門外連夜修築濠壘與城賊相爲犄角十二月初三日各軍分三路進剿該逆由北門出悍賊千餘東北門外村房內出賊數千分投迎拒黃少春率各營由左路先進揮兵猛擊賊敗走乘勢將港邊

賊壘焚燬并破賊卡二重斬悍賊數十名副將劉明燈等三營亦由三里鋪直攻賊壘噴筒火箭迸射壘中須臾火起賊棄壘而遁其張聲恒魏喻義各營由中路進者力戰逾時該逆死拒不退適劉明燈等馳至左路各營復從樹林中橫截而出賊始奪路竄走各軍追近北門港邊突有黃帽紅衣騎馬賊目數人率悍黨迎頭抗拒羣賊拚命回闔左路敗黨亦紛紛來撲賊勢克悍各軍整隊迎敵楊昌濬督親兵及羅大春簡桂林所部更番鏖戰數時賊勢復却其劉墩等各營由右路進攻西

北角城壘直逼卡門奮力攻撲壘已垂破賊忽分投從
旁抄出截我後路朱明亮余佩玉督勇馳擊賊仍縮退
壘中各軍困苦職竟日時已申刻乃收隊還計共破賊
三大壘擊斃悍賊數百名生擒二十餘名奪獲旂幟洋
鎗各械無算此餘杭西北一路破壘獲勝之情形也其
東路倉前等處爲通杭州要路賊於太平橋牛畷姚家
埭王家廟閔竺堰等處修築堅壘以與倉前之賊聯絡
一氣康國器於初三口派吳光亮康熊飛古捷芳林珠
林木丁應龍等將姚家埭王家廟閔竺堰等處賊壘四

座攻克殺賊數百名乘勢進攻牛駝賊壘首逆汪海洋
率倉前林清堰太平橋等處賊黨來援復經吳光亮古
捷芳康熊飛等截殺斃賊六七百名奪獲槍礮旂幟數
百件此餘杭東路破壘獲勝之情形也該逆自此次擊
敗後勢愈窮蹙晝夜鼠伏濠內任我百計誘戰堅匿不
出我軍苦乘勢逼攻往往爲鎗礮所傷非取遠勢包圍
絕其糧道不足制賊死命臣卽日進駐餘杭之橫溪頭
當相機督剿以期迅拔堅城其蔣益澧攻杭一軍十二
月初一日獲勝後僅餘石塘賊壘三座未被初二日復

率各營力攻該逆踞守甚堅未能卽拔蔣益澧已飭各營分紮錢塘湧金鳳山清波等門裏賊中央自難竄逸初六夜逆賊偷撲錢塘門外羅三綱營壘經羅三綱擊退惟地勢延紮太寬兵力尙不敷分布臣已將徐文秀駐紮橫溪頭五營調歸蔣益澧一處併力規杭其水師劉連陞楊政謨羅啟勇梁雲山彭大光等營於初五日進攻清泰門外觀音堂賊壘分兵將附城房屋燒毀城賊來撲劉連陞楊政謨等督隊奮擊斃賊數十名賊敗退劉培元復因西湖一帶港汊紛歧飭蔣榮彩劉仁

和等擡水師舢板戰船十號由錢江入西湖初八日蔣榮彩劉仁和等奪獲礮船三號小划船十餘號斃賊百餘名現據各路稟報平湖乍浦海鹽之賊俱已投誠經各鄉團收復海甯州城賊曾亦有獻城之說蔣益澧委署杭州府知府陳思燭前往辦理如杭州各屬以次收復漸漸移軍西向則杭賊勢孤自亦無能久踞而現在杭州餘杭兩城必須有一先下則全局皆活嘉湖兩郡乃可次第肅清臣惟當督飭各軍慎以圖之以冀仰紓宸廑所有攻剿餘杭獲勝及現籌布置情形理合據實

馳

奏伏乞

皇上聖鑒訓示施行謹

奏

同治二年十二月十三日

議政王軍機大臣奉

旨另有旨欽此

援剿江皖出力人員請獎摺

奏爲查明浙師援皖援江在事出力人員兵勇請

旨獎叙以勵戎行事竊臬司劉典一軍於二月赴援徽

郡擊敗大股逆賊肅清休甯祁門克復黟縣除劉典等
已隨摺奏獎外其餘出力員弁奉

旨交臣擇尤保奏在案嗣因逆賊竄擾江西景鎮戒嚴

劉典復率所部馳援大小數十戰浮梁鄱陽彭澤等處
之賊悉數驅除江境肅清大局穩固該將士等迅赴戎
機所向克捷實屬異常出力經臣飭令劉典將出力各
員覈實查明附入克復黟縣案內一併奏乞

恩施茲據劉典開單具詳前來臣覆覈無異除出力稍
次者咨部註冊外其應行奏保各員謹繕列清單恭呈

御覽又在營病故之副將銜叅將熊正坤等五員應併請

飭部照軍營立功後病故例議卹理合恭摺附驛具奏伏乞

皇上聖鑒施行謹

奏

同治二十二月十三日

議政王軍機大臣奉

旨另有旨欽此

覆陳籌辦軍事情形片

再本月初九日欽奉十一月十四日

寄諭李鴻章奏官軍克復無錫金匱縣城一摺暨陳近日賊情籌辦大畧情形一片所稱忠逆李秀成自十年春間疊陷蘇杭各處盡得東南財賦之區日益强悍至去歲賊勢屢挫精銳散亡洪逆驚惶失措猶賴忠逆回援主持守局該逆以蘇州爲分地其部眾逆首尤以譚紹光邵雲官陳炳文鄧光明黃子澹等爲尤眾且悍此次蘇錫兩城之克剿除逆酋殆盡解散逆眾均各數逾億萬李秀成之巢穴旣失黨羽亦孤該撫據獲賊供稱

該逆踉蹌西走隨行僅止兩萬餘人將赴金陵設法解圍計不得施則挾洪逆併其母妻眷屬由浙皖交界竄走江閩以尋回粵之路李鴻章自入蘇城徧察賊中規畫守禦頗饒賊智深以此酋逸出江同恐仍蔓延爲害其常州護逆陳坤書不甚耐戰杭州之陳炳文鄧光明聞忠逆勢敗思歸多不願從惟溧陽侍逆李世賢戰守俱悍且與忠逆同惡相結而陳鄧等逆酋以嘉湖蓄糧甚多必須死守幸而官軍各路布局皆穩金陵杭州再有一處得手賊更瓦解該撫擬於卽日馳赴錫城籌布

進取令程學啟會同李朝斌劉秉章潘鼎新水陸各軍由平望太湖乍浦兜剿而來冀與左宗棠蔣益澧一軍前後夾擊李鶴章劉銘傳各軍進圖常州宜與兜剿蘇境之賊冀與曾國荃鮑超之軍前後夾擊以分各路賊勢而固蘇滬藩籬所籌均極周至卽著曾國藩飭令曾國荃與左宗棠聯絡進止督率各路將領與李鴻章部勤諸軍相爲策應相機進取如賊欲由浙皖毗境竄出江閩各路或由乍浦海口登船逃逸並著曾國藩左宗棠豫籌堵截沈葆楨現已力疾視事其餘江省饒信等

防經營有素此時尤當嚴密設防不可稍涉疏虞並與曾國藩左宗棠隨時函商布置所有江忠義席寶田等軍現在是否尙駐贛饒境內亟應妥籌調度以赴事機曾國藩前奏鮑超及王可陞等軍分駐東壩溧水高淳及皖南甯池等屬左宗棠前奏劉典王開琳各軍以次由孝豐等處進發兼顧皖防諒皆各有成算在胸與李鴻章所籌定相符合金陵漸已合圍杭湖亦已分軍進搗時勢均有可圖該督撫等務須聯絡一氣層層進逼萬不可稍涉遷延惟賊勢雖衰而人數尙眾總宜力求

穩愜以保萬全縱或各城收復稍稍斷不可令李秀成
潰圍逃逸務將此賊就地芟除絕其根株免致竄擾完
善辦理更形費手方爲至善將此由六百里各諭令知
之欽此詭誦之下欽佩莫名臣維逆賊起事各渠魁之
最悍者均已次第殲除以現存悍賊而論惟李秀成與
李世賢而李世賢自金華敗遁後所部悍黨僅有存者
勢缺不逮李秀成而與之同惡相濟然則官軍所宜併
力急圖者李秀成李世賢而已蘇州未復之先李秀成
已遁回金陵聞有欲挈洪逆出走之說臣處相距稍遠

未得確耗然當徽池肅清之時揣賊勢必以皖浙爲逃
竄之路十月十四日咨商會國藩皖軍出甯國縣進廣
德以力扼東壩浙軍由昌化於潛進孝豐以規湖州准
會國藩十月二十九日咨復廣德撫局未成各軍分守
城隘別無大夫勁旅可以進剿廣德不克與浙師聯絡
相應臣以皖軍旣未能進剿廣德則浙師由於潛昌化
以進孝豐旣有兩面受敵之虞且所苦者皖浙交界各
縣久遭蹂躪民多流亡田土荒廢殆盡不但無米可買
且轉運亦極艱難非先取餘杭則軍食無從轉饋孝豐

安吉之賊既均以食盡自走所存賊卡寥寥官軍不難
剿賊而難於久駐是浙師亦不克與皖軍聯絡相應不
得已乃留王開琳一軍三千三百人仍駐徽州之屯溪
鎮伺賊所向截之而令記名總兵黃少春代統劉典所
部會攻餘杭俟餘杭攻克乃可規德清以通水運也賊
如由湖入浙臣力或能制之惟王開琳老湘營全軍雖
在皖屢立戰功究之力薄勢孤難當巨股悍寇如果李
秀成挾洪逆以來能否邀擊得手實無把握登接曾國
藩檄讀言布置皖南所屬貼近江西各城此外別無大

枝遊擊之師臣已三次函商遠防不如近剿請其注意

廣德以現在局勢言之金陵賊勢甚蹙覓路逃竄本在意中縱洪逆戀其巢穴誓以死拒李秀成李世賢等未必肯束手就戮縱李秀成李世賢等肯束手就戮而將黨尙眾亦必覓路紛逃况現在句容溧陽廣德一帶現尙爲悍賊所據賊之必由此路逃竄殆無可疑設由廣德州竄入皖南腹地雖無糧可掠無人可擄然賊果晝夜疾馳不數日即可出險志恐城各將來弗擊去弗追終成不了之局也會國藩慮無大枝遊擊之師意或在

此然臣竊有請者賊勢實已窮蹙官軍合計兵力亦不
爲單如果權其緩急應之自能有濟就現在局勢而言
蘇州既克杭州之圍正急悍賊鄧光明既誅陳逆炳文
汪逆海洋均在杭餘兩城自救不暇海鹽平湖又已收
復其海甯嘉興之賊不足爲蘇州之患也是李鴻章所
部可緩攻嘉興其踞常州之逆爲陳坤書李鴻章既首
其不甚耐戰自無能爲暫舍此不攻金陵一破常州亦
必應手而下是李鴻章所部可緩攻常州惟溧陽一縣
爲各逆眷屬所在守賊李世賢又狡悍著聞賊如思慮

必假塗於此李鴻章如暫緩嘉興常州不攻派得勝之師由無錫移軍急攻宜興溧陽西北與會國藩溧水守軍互相聯絡縱溧陽未能卽拔而此路要可無虞賊縱由溧陽衝出與廣德之賊台夥李鴻章之軍猶可蹤蹤猛追不令善脫較之空此一路任賊竄過自爲勝之會國藩力持堅守之議現在布置皖南江西一帶防兵固爲老成之見然賊知我以堅守爲主必不攻各將以堅守爲事必不戰倘賊捨城不攻從間道疾馳而過恐調撥尾追亦有所不及何如厚集兵力扼廣德建平東壩

總要數隘與李鴻章一軍互相聯絡之爲得乎至江西
距賊稍遠爲饒廣計均宜以嚴扼昌江力保上游爲主
如婺源祁門石門諸處是也苟兵力有餘則仍以連防
廣德州甯國縣爲要至乍浦海口盜船無多不能容載
多人巨股或不致從此漏逸臣思慮所及不敢不畢獻
其愚伏乞

皇上飭下曾國藩李鴻章沈葆楨酌議可否臣拜摺後
亦卽抄稿咨送所有覆奏籌辦情形謹附片具陳敬祈
聖鑒訓示謹

奏 同治二年十二月十三日

議政王軍機大臣奉

旨另有旨欽此

議政王軍機大臣 字寄同治三年正月初二日奉

上諭左宗棠奏攻剿餘杭踞賊獲勝及覆陳籌辦大畧情形李鴻章奏常州擊退援賊力解奔牛重圍等各摺片本日已將常軍力戰解圍焚奪輪船等情明降諭旨宣示並出力各員照李鴻章所請獎叙矣奔牛一鎮爲鎮常要衝李秀成李世賢等巨酋方以死力護金陵老

巢後路糾集大股圍困唐尉魁等新營並用輪船炸礮
力爭其地官軍以少禦眾勢頗危險竟能力解重圍焚
其輪船所辦尙好李鴻章既據會國荃函會李秀成由
金陵出城向句容而去又獲賊供圍奔牛時李秀成亦
在其內是此賊猶恃其狡悍必欲爭此要衝以爲竄走
之路與左宗棠所奏賊必由句容溧陽廣德一帶圖竄
等情正相符合李鴻章現飭李鶴章劉銘傳等相機圖
攻常城並防忠逆回援著卽妥籌兼顧左宗棠所部黃
少春等軍攻剿餘杭踞逆東西北路均破壘獲勝將益

澧攻杭一軍分紫錢塘等門裏賊中央不容竄走復進
攻清泰門之觀音堂賊壘水陸進逼杭屬平湖乍浦海
鹽之賊俱已投誠海甯州賊亦有獻城之說杭賊勢必
益孤左宗棠進駐橫溪頭督勦餘杭與蔣益澧攻杭之
軍必當有一先下嘉湖乃可次第肅清卽著督令所部
迅圖攻取該督以賊中狡悍惟李秀成李世賢同惡相
濟所當併力急圖現在蘇州以克金陵杭州均圍攻緊
急賊勢必以皖浙爲逃遁之路廣德撫局未成會國藩
所部不敷分兵進勦左宗棠留王開琳一軍仍駐徽州

之屯溪鎮究恐力薄勢單如李秀成果挾洪逆由此路突出恐不足資扼截而現在勾溧一帶賊踞甚堅溧陽更爲賊之眷屬軸重所在李秀成李世賢復併力於此官軍獨唐殿魁等各營僅守奔牛一鎮頗覺空虛曾國藩左宗棠等老謀均不急求且夕之功而欲併力聚殲使賊不得鋌走所見本同卽李鴻章登克蘇錫各城與力爭奔牛亦必能識此意惟常州攻搗勢在垂克恐未能令各軍捨而他圖常賊雖不耐戰而守亦頗堅若不速籌攻克保無別生枝節李鴻章諒有成竹在胸左宗

棠此奏謂曾國藩急應分兵以取廣德力顧東壩與浙師聯絡李鴻章急應由無錫攻宜溧使賊不致田此路挺走自屬確有所見著曾國藩左宗棠李鴻章沈寶楨悉心商酌謀出萬全以期合力同心膚公迅奏爲東南半壁一勞永逸之計左宗棠片內稱已將所奏各情抄稿咨送曾國藩等酌議原片即可毋庸抄給閱看江省之防據左宗棠奏以嚴扼昌江力保上游爲主昌江係屬何水著沈寶楨嚴密布置與皖境浙師相爲策應並遵前旨將饒信兩防各軍妥爲調度豫籌堵截奔牛降

人前據李鴻章奏係邵小雙此次所保之邵之倫請賞
加遊擊銜業經照准是否卽係其人現在該處守禦緊
要該降人等是否出力可靠著李鴻章查明具奏欽此